

## 20 onns dapi las midadas istoricas

(anr) Uonn èsi 20 onns dapi ch'ils reschims totalitars en l'Europa èn dads ensemen 1989. Qua tras è la divisiun sistemica tranter ost e vest vegnida surmuntada. Sco simbol per quest svilup vala la disfatga fisica e politica dal mir a Berlin ils 9 da november 1989 tras la populaziun. Curt suenter è er il Patg militar da Varsovia (dals stadis communistics) vegnì schlià si e la Nato s'orientada da nov.

La OSZE, l'organisaziun per segirezza e collavuraziun en l'Europa, ed il Cussegl Europeic han modifitgà e schlargià lur radius d'acziun. L'avischinaziun en l'Europa n'è betg ida senza conflicts sin plaun local e regiunal. Era problems economics ed ecologics èn sa mussads.

Da muntada centrala per il svilup da l'entir continent è l'Uniun Europeica stada. Suenter sia extensiun en l'Europa orientala ha ella ussa 27 stadis-commembers. Quest process n'è dentant anc betg terminà. Finamira suprema è da construir cun meds economics e politics ina Europa stabila e paschaivla. Sa gidar latiers ston tuttas regenzas ed ils carstgauns. Gist en noss temp da crisa finanziaria ed economica è solidaritad indispensabla.

En il rom da las cunvegns bilaterals po era la Svizra contribuir considerablmain en conresponsabladad sco stadi da l'Europa. Era l'Associaziun svizra da Helsinki per democrazia, stadi costituziunal e dretgs umans vegn a s'occupar quest atun tar sia radunanza annuala a Turitg da las midadas dapi 1989 en l'Europa sco era cun las consequenzas ed ils duairs ch'èn sa dads da quai.